

Իսկ այժմ տեսնում էի ընկերներինս նոյն հասակում, որոնք ցոյց էին տալիս խեղդող մարդիկներին եւ ասում էին ինձ՝ «տե՛ս, Ֆարիատ, ինչպե՛ս տարւում են այդ անբախտները հոսանքի հետ, գնանք, ազատենք նրանց»:

Երբ աչքս կրկին դարձրի դեպի գետը, ալիքների մեջ տեսայ մի քանի ինձ ծանօթ երեսներ – Մարիամին, Մագթաղին, իմ հորը, իմ մօրը, – իմ աչքերի առջեւ մթնեցաւ, վազեցի դեպի ափը, որ օգնութիւն հասցնեմ: Յանկարծ գետի խարխուլ եզրը փոփ եկաւ, ես գլորոեցայ ցած...: Ինչպէս մի թեթեւ փետուր ես տարւում էի պղտոր հոսանքի հետ... կատաղի ալիքները շատ անգամ խորասոյգ էին անում ինձ դեպի յատակը, շատ անգամ դուրս հանում. կրկին տեսնում էի սիրելի պատկերները սարսափած եւ գունաթափ երեսներով...: Աշխատում էի ափին մօտենալ, հնարք չէր լինում, իմ թեւերի ուժը հետզհետէ թուլանում էր, եւ ես խեղդելու մօտ էի... Ես կանչում էի Կարօյին, Ասլանին եւ Սագօյին, որ նրանք ազատեն ինձ. բայց երբ աչքս դարձրի դեպի հոսանքի ընթացքը, տեսայ, նրանք էլ տարուբերում են ալիքների մեջ...:

Յանկարծ յայտնուեցան երկու կերպարանքներ, որոնք ձեռքները մեկնած, աշխատում էին ազատել ինձ, նրանցից մէկը տխուր էր դեմքով եւ աչքերումը արտասուք կար, միւսը ուրախ եւ պայծառ էր երեսով եւ հրեղէն աչքեր ուներ: Ինձ երեւաց, թէ նրանք երկու հրեշտակներ էին, որոնք իջան երկնքից. իսկ յետոյ ճանաչեցի՝ մէկը Սոնան էր, միւսը՝ Մարօն, յետո՛յ, երբ ես թաղոեցայ ջրի տակ եւ միւս անգամ դուրս չեկա...:

Երբ ես զարթեցայ, Կարօն կանգնած էր իմ մօտ:

– Դու հիւանդ ես, Ֆարիատ, – ասաց նա խռոված կերպով: – Քո երեսը մեռելի գոյն է ստացել, դու այնպէս սարսափելի բաներ էիր խօսում քնիդ մեջ...:

Ես պատասխանեցի, թէ քունս անհանգիստ էր, եւ ես ոչ բուլրովին առողջ եմ զգում ինձ. գլուխս սաստիկ ցաւում է, անդամներս ջարդւում են, որպէս թէ ամբողջ մարմինս սանդի մեջ ծեծած լինեի:

Կարօն յայտնեց ինձ, թէ իրանք պետք է գնան Բարդուղիմէոս առաքելոյ վանքը «մի գործի» համար եւ կը վերադառնան միւս օրը երեկոյեան, եւ խորհուրդ տոեց ինձ մնալ ծերունի որսորդի տանը, անլացնելով, թէ գիշերը տաղաւարից դուրս բացօթեայ քնելով, մրսած կը լինեմ, պատուիրեց տաք բան խմել եւ քրտնել, որով շուտով կ'անցներ տկարութիւնը:

Երբ նրանք նստեցին ձիաները, կամենում էին հեռանալ, Սագօն մօտեցաւ ինձ եւ խուլ ձայնով ասաց.